



Inatsisartunut ilaasortaq Suka K. Frederiksen, Siumut

## § 37 naapertorlugu apeqqutigineqartup 204-p 26. juli 2016-imeersup akissutaa

Asasarput Suka K. Frederiksen

Brevdato: 11-08-2016  
Sags nr. 2016-11979  
Dok. nr. 12350800

Apeqqutinut ulloq 26. juli 2016-imeersunut qujavugut. Ataani apeqqutit  
issuarneqarsinnarlutik akissuteqarfigineqartassapput.

Postboks 909  
3900 Nuuk  
Tlf.: (+299) 34 50 00  
Fax: (+299) 32 52 86  
E-mail: isan@nanoq.gl  
www.naalakkersuisut.gl

### 1. Aningaasaqarnermut inatsimmi 2015 aammalu 2016-mi konto 996.34.527 suliassatut allattorsimasut Narsami, Qaqortumi, Paamiut, Maniitsoq, Sisimiunullu suliniutit sumut killippat?

**AKISSUT:** 2015-imut Aningaasaqarnermut Inatsimmi suliniut 996.34.527 pillugu  
immikkoortitaakkanik nalunaarsuiffimmit takuneqarsinnaavoq nutarterinermik  
suliaqarnissamut misiliutigalugu sulianik suliarinnittoqassasoq, Nanortalimmi,  
Qaqortumi, Maniitsumi, Aasianni Tasiilamilu ingerlanneqarnissaat ilimagineqarlutik,  
kiisalu aamma illuutit attartortittakkat nungullarsimasut iluarsartuunneri ilaatigut  
Qaqortumi, Narsami, Paamiuni, Maniitsumi aamma Sisimiuni ingerlanneqassallutik.  
Tassunga atatillugu Naalakkersuisut ilisimatitsissutigisinnaavaat misiliutigalugu  
sulianut ilaammat Namminersorlutik Oqartussat illuutaasa ilai qinikkat qanoq issusii  
nalunaarsorneqassasut nutarterneqarnissaasa pilersaarusiornissaat siunertaralugu,  
nutarterineq nalitsinni pitsaassuseq tunngavigalugu aallaaveqartoq, tassunga  
ilaatigut ilaalluni sanaartornermi maleruaqqusanut atuuttunut  
naapertuuttunngorsarneqarnissaat. Pilersaarusiorneq nutarterinerni arlaqartuni  
ingerlanneqarsimavoq, taakkunanilu amerlanerni suliap akisunerulerneranik  
kinguneqarsimavoq illersorneqarsinnaasumillu naammassineqarsinnaanatik,  
ingammik aningaasartuutit tamarmiusut malitsigisaanillu inigisamut akiliutaasussat  
eqqarsaatigalugit. Taakkunannga immikkoortuuvoq Tasiilami B-60-ip nutarternera,  
suliffissaqartitsinermit suliniummut Naalakkersuisunit 2014-imi akuerineqartumut  
ilaatillugu naammassineqarsimasoq. Nutarterinermut suliniutit eqqarsaatigalugit  
killiffii ima isikkoqarput:

Naammassineqartut: Qaqortumi Blok F; Paamiuni Blok X, Blok Æ aamma Blok Z;  
Maniitsumi B-204, B-205 O.Petersenip Aqq. aamma B-889, B-890 Ivissuaateralaa;  
Sisimiuni Blok 12.

Ingerlasut: Paamiuni Blok Ø; Maniitsumi B-160 O.Petersenip Aqq.; Sisimiuni Blok 11.  
2016-imi suliariumannittussarsiuussinerit ingerlasut imaluunnit ingerlanneqartussat:  
Qaqortumi Blok E; Narsami Blok C; Paamiuni Blok V; Maniitsumi B-187.

Tamatuma saniatigut Naalakkersuisut nalunaarutigisinnaavaat illut sinneri 2015-imut  
Aningaasanut Inatsimmiittut Namminersorlutik Oqartussat illuutaasa 2016-2020  
nutarterinermik pilersaarutaannut ataatsimoortumut ilaatinneqarmata. Pilersaarut  
taanna Namminersorlutik illuutaat pillugit illoqarfikkuutartumik suliaqarfiit  
pilersaarutaanni suliat ingerlanneqartut naapertorlugit nutaarsiasanik kingullernik  
malinnaatinneqartarpoq.

2016-imut Aningaasanut Inatsimmi suliniummut 996.34.527-imut immikkoortitaarinermi takuneqarsinnaavoq nutarteraluni suliniuteqarnermut tunngatillugu suliaqarfiit pilersaarutannik suliaqartoqartoq, Naalakkersuisullu nalunaarutigisinnaavaat Nanortalimmi, Qaqortumi, Narsami Aasiannilu ornigulluni illunik misissuisoqarsimammat. Siunertarineqarpoq illoqarfinnut 12-usunut suliaqarfiit pilersaarutaat 2017-ip aallartilaarnerani naammassineqarsimassasut. Tassunga atatillugu Naalakkersuisut nalunaarutigisinnaavaat nutarterinermut najoqqutassiap "Najugaqarfiit Qungujulasut" Nuummi Blok 2-10-mi misilerneqarmat, najoqqutassiallu sanaartukkanut allanik ilusilinnut ineriartorteqqinnera qanittumi aallartinneqarsimalluni. Najoqqutassiaq ineriartortinneqareerluni inerpat Namminersorlutik illuutaannut annertuumik oquffiusimasunut taamaattumillu atorineqanngitsunut atussallugu siunertarineqarpoq, illoqarfiit immikkoortuinut pilersaarutissat naapertorlugit nutarterinissamut suliassanut innersuussutaasunut ilaatillugit.

**2. Narsami Blok C isaterneqarnisaanut pilersaarut, siornali ingerlasoq pilersaarutaannaajunnaarluni qaqugu isaterneqassava?**

**AKISSUT:** Naalakkersuisut nalunaarutigisinnaavaat Narsami Blok C-p isaternissaanut suliariumannittussarsiuussineq ingerlanneqarmat, ulloq 5. august killigalugu. Suliariumallugu neqeroorutit naammaginartut tiguneqarsimassappata suliarinera augustip naalernerani aallartinneqassaaq 2017-imilu julimi inerneqarnissaa ilimagineqarluni.

**3. Narsami qalissianik taarsersuinissap 2015-mili ingerlanneqartussat "sanassusaaleqineq pissutigalugu" kinguartinneqartoq qaqugu aallartinneqassava?**

**AKISSUT:** Naalakkersuisut nalunaarutigisinnaavaat suliassaq pillugu suliaqartinniakkat ilisimatereerlugit neqerooruteqartitsisoqassammat augustip naalernerani / septemberip aallartilaarnerani. Suliariumallugu neqeroorutit naammaginartut tiguneqarsimassappata suliarinera tamatuma kinguinngua aallartinneqassaaq, qaammatillu 2 missiliorlugit ingerlaneranni naammassineqassangatinneqarluni.

**4. Nuna tamakkerlugu isaterinernut pilersaarutit ilaat suliffissaqartitsinermi aallaaveqartumik aningaasalersorneqarlutik ingerlanneqarniarput ilaalli najukkani entreprenørit sanasullu atorlugit ingerlanniarneqarlutik – sooq assinngitsunik periuseqartoqarpat?**

**AKISSUT:** Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq naapertorlugu Naalakkersuisut sanaartugassat tamarmik suliarineqarnissaannut suliariumannittussarsiuussisarlutillu suliakkiissutit tunniuttarpaat. Sanaartugassat sulluunniit immikkut pineqarneq ajorput, ass. isaterineq suliassallu allat. Taamaakkaluaq Naalakkersuisut sanaartugassat ima aaqqissorlugillu pilersaarusiorniarsarisarpaat sumiiffinni aalaakkaasumik suliassaqartitseqataasinnaatillugit.

**5. Narsami Namm.Oqartussat / kommuunillu inissiaatai (takussutissami immikkoortillugit) qassit ineqaratik matoorneqarnikuuppat?**

**AKISSUT:** Kommuniq pillugit Naalakkersuisut paasissutissat taamaattut piginnngilai Kommune Kujalleq-lu sinnerlugu akisinnaanani. Kisianni Namminersorlutik Oqartussat illuutaanut tunngatillugu INI A/S nalunaarpoq Namminersorlutik Oqartussat illuutai katillugit 64 inoqanngitsut matuneqarsimallutillu, illuutini pingasuni: Blok C, Blok E aamma B-228.

**6. Narsami inissiani ineqaratik matoornikuni suna patsisigineqarpa (Namm.oqartussat/Kommuunimi)? Qanoq pilersaaruteqarfigineqarpat?**

**AKISSUT:** Naalakkersuisut Namminersorlutik Oqartussat illuutaanut tunngatillugu nalunaarutigisinnaavaat illuutit aserfallassimanerat pissutiginerullu inoqartinneqanngitsut, nutarterinissamut aningaasartuutissat annertuut, illersorneqarsinnaasutut naammaginartutullu oqaatigineqarsinnaanngitsut, pisariaqartinneqarlutik. Tamatuma saniatigut ineqarfiit amerlasuut attartortikkuminaapput illoqarfimmi inissanik pisariaqartitsisoqanngimmat.

**7. Naalakkersuinikkut sumiifinni "sanassusaaleqisarneq" anigorniarlugu qanoq iliuseqartoqarpa?**

**AKISSUT:** Naalakkersuisut suliariumannittussarsiuussinerni sanaartornerup sukkassusia sukkavallaanngitsumik ingerlasassasoq assut pingartippaat sumiifinni assatik atorlugit sulisartut, håndværkerit, ingerlalluartut aalaakkaasullu atatikkumallugit. Naalakkersuisut suliaqarfiit tamaasa akimorlugit suliaqarfinnut pilersaarutit suliarineqarnissaat aallartitissimavaat, sanaartugassanut pilersaarutit pitsaanerpaamik naammassineqartarnissaannut ilapittuutaasussat. Suliaqarfinnut pilersaarutit sukkavallaanngitsumik aalaakkaasumillu sanaartortoqarnissaanik kinguneqartitsissapput, nunamut tamarmut naligiikannersumik agguarlugit, neqeroortitsisut akornanni pitsaasumik unammilleqatigiinnermik ineriartortitsinissamullu periarfissanik pilersitsilluni. Naalakkersuisut nalunaarutigisinnaavaat pisortat sanaartugassaatai 500.000 kr.-nik akisunerusut tamarmik tamanut suliariumannittussarsiuunneqarsimammata, soqutiginnittullu kikkut tamarmik sumi najugaqarnerat apeqqutaatinnagu neqerooruteqarnissaminut periarfissillugit.

**8. Qulaani pineqartuni allanik ilanngussassaqarpat ilanngunneqarnissaat kissaatigaakka.**

Inussiarnersumik inuulluaqqusillunga

Knud Kristiansen